

# সূত্র

প্রিন্ট: ১৩ জানুয়ারি ২০২৫, ০১:৩৪ পিএম

শিক্ষাঙ্গন

## গুচ্ছ থেকে বের হতে কুবি শিক্ষার্থীদের ৭২ ঘণ্টার আলটিমেটাম



কুবি প্রতিনিধি

প্রকাশ: ০৯ জানুয়ারি ২০২৫, ১০:৫৪ পিএম



গুচ্ছ ভর্তি প্রক্রিয়া থেকে বেরিয়ে এসে নিজস্ব পদ্ধতির পরীক্ষায় ফিরে আসার দাবিতে মানববন্ধন করেছেন কুমিল্লা বিশ্ববিদ্যালয়ের (কুবি) শিক্ষার্থীরা। তিন দিনের মধ্যে গুচ্ছ থেকে বের হয়ে আসার ঘোষণা না দিলে সকল প্রকার প্রশাসনিক কার্যক্রম বন্ধ করে দেওয়ার হুঁশিয়ারি দেন তারা।

বৃহস্পতিবার প্রশাসনিক ভবনের সামনে মানববন্ধন করেন তারা।

এ সময় শিক্ষার্থীরা বলেন, গুচ্ছের অভিশাপ থেকে আমরা সবাই মুক্ত হতে চাই। কোনো শিক্ষার্থীর জীবন যেন গুচ্ছের জাঁতাকলে পিষ্ট হয়ে তার ধ্বংস না হয়। তারা আরও বলেন, আমরা আলটিমেটাম দিচ্ছি যদি কুমিল্লা বিশ্ববিদ্যালয় গুচ্ছ থেকে বের না হয় তাহলে ক্যাম্পাসের সকল প্রশাসনিক কার্যক্রম বন্ধ করে দেওয়া হবে। শিক্ষার্থীদের আন্দোলনের মধ্য দিয়ে উপদেষ্টারা দায়িত্ব পেয়েছেন। আপনারা শিক্ষার্থীবান্ধব শিক্ষাব্যবস্থা গ্রহণ করবেন এবং বিশ্ববিদ্যালয়ের মতো প্রতিষ্ঠানে কোনো কিছু চাপিয়ে দেবেন না।

এ বিষয়ে শিক্ষার্থী হান্নান রহিম বলেন, কুমিল্লা বিশ্ববিদ্যালয়ের সব স্টেকহোল্ডার চায় কুবি গুচ্ছ থেকে বের হয়ে আসুক। আমরা ৭২ ঘণ্টার আলটিমেটাম দিচ্ছি। যদি এর মধ্যে গুচ্ছ থেকে বের হয়ে না আসে তাহলে রোববার দুপুর ১২টার পরে বিশ্ববিদ্যালয়ের সব প্রশাসনিক কার্যক্রম বন্ধ করে দেওয়া হবে।

উল্লেখ্য, শিক্ষার্থীদের দাবির মুখে গত বছরের ১৫ ডিসেম্বর গুচ্ছ থেকে বেরিয়ে আসার ঘোষণা দেয় কুবি প্রশাসন; কিন্তু শিক্ষা মন্ত্রণালয়ের চাপের মুখে এ সিদ্ধান্ত থেকে সরে আসতে বাধ্য হয় কুবি। তার পর থেকে শিক্ষার্থীরা আন্দোলন করে আসছে।